

Uunga siunnersuut: Kalaallit Nunaanni pasinapiluttumik kalerriisunik illersuineq pillugu Inatsisartut inatsisaat

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)

Saqqummiussissut**Siullermeerinnineq**

Naalakkersuisut sinnerlugit matumuuna pasinapiluttumik kalerriisunik illersuineq pillugu Inatsisartut inatsisaat saqqummiuppara.

Inuk pasinapiluttumik kalerriisoq tassaavoq inatsisinik unioqqutitsisunik, ileqqorluttuliornermik ajoqusiisinnaasunilluunniit iliuutsinik suliffeqarfiup, kattuffiup inuilluunniit ataasiakkaat iliuusaannik qulaajaasoq nalunaarutiginnittorluunniit. Pasinapiluttunik kalerriisoq tamanut iluaqtissatut isertuussanik naapertuilluanningsuliornermilluunniit paasititsinissamik kissaateqarluni iliuuseqartarpoq. Taakku imminut iluaquserniarluni pinerluttarnerit, sulinermi atukkat navianartut, avatangiisinik mingutsitsinerit suaassutsikkulluunniit innarliinerit qulaarsinnaavaat.

Pasinapiluttunik qulaajaasoq sulisuusinnaavoq, siusinnerusukkut sulisuusinnaavoq inuusinnaavorluunniit suliffeqarfimmut pineqartumut toqqaannartumik attuumassuteqanngitsoq.

Pasinapiluttunik kalerriisut inuiaqatigiinni ersarissuunermik, akisussaassuseqarnermik naapertuilluartuliornermillu attassinermut pingaarutilimmik inissisimaffeqarput. Taakku pissaanermik atornerluinermik, imminut iluaquserniarluni pinerluttarnerit allatigullu inatsisinik unioqqutitsisunik iliuuseqarnermik inuiaqatigiinnut ataatsimut pitsaanngitsunik kinguneqarsinnaasunik qulaajaallutillu pinngitsoortitsisinnaapput.

Taamaammat pasinapiluttunik kalerriisartut naapertuuttumik illersorneqartariaqartut Naalakkersuisut isumaqarput. Taamatut illersuineq ilaatigut uatsinnit innuttaasunit pasinapiluttunik kalerriisartunik, kinaassutsiminnik isertuussillutik Kalaallit Nunaannik inuuffigiuminarnerulersitsinerimut ikiuuttunik, ikorfartuillutillu illersuisuinngaanniissaaq. Pasinapiluttumilli kalerriisut aamma inatsisitigut aningaasatigullu illersorneqarnissamik pisariaqartitsipput. Taamaammat Naalakkersuisut maanna iluarisimaarlutik pasinapiluttumik kalerriisunik illersuineq pillugu Inatsisartut inatsisaattut siunnersuut saqqummiuppaat.

Kikkulluunniit isumannaatsumik toqqissisimanartumillu pasinapiluttunik kalerriisinaanissaat siunnersuutip toqqammavigaa. Sulisartuq kalerriinissamik isumaliuteqarnermini tunuarsimaarnanilu pillarneqarluniluunniit akiniarneqarnissamik aarleqquteqassanngilaq.

Siunnersuut 2022-mi Inatsisartut ukiakkut ataatsimiinneranni ilaasortap siunnersuummik saqqummiussineranik, tamatumani isertuussanik kalerriisartut pillugit inatsisissamik kalerriisartunik illersuisussamik Naalakkersuisut siunnersuuteqarnissaannik tunuliaqutaqarpoq. Naalakkersuisut inatsisissatut siunnersuummik suliarinninnermini aalajangiiffigisassatut siunnersuutip taaneqartup suliarineqarnerani Inatsiseqarnermut Ataatsimiititaliap saqqummiussai kiisalu tusarniaanermi saqqummiussat pingaartippai.

Inatsisissatut siunnersuut pingasunik siunertaqarpoq:

1. Kalaallit Nunaanni pasinapiluttunik kalerriisarnermik aaqqissuussinermi nalunaaruteqartarnermi malittarisassat assigiiaartut. Tamanna inatsisikkut ugguuna pivoq.
2. Sulisitsisut sulisartumik pasinapiluttumik kalerriisimasumik pillaaniarneranni annertusisamik uppernarsaasiisussaataitanermik atulersitsineq. Tassa sulisitsisoq pasinapiluttumik kalerriisimasumik soraarsitsinissamut, nuutitsinissamut suliassanilluunniit annertuumik allannguinnissamut immikkut pitsaassusilimmik tunngavissaqassaaq, iliutsimmi pasinapiluttumik kalerriisimanermik patsiseqarsimanissaat ilimagineqartariaqarmat.
3. Pasinapiluttumik kalerriisut naapertuilluartumik naleqquttumillu aningaasanik taarsiivigineqarnissaannik qularnaarinnineq. Pasinapiluttumik kalerriuteqarsimasup kalerriisimanera pissutigalugu soraarsinneqarnerani pillarluguluunniit akiniarneqarnerani taamatut taarsiisinnaaneq pisariaqarpoq. Sulisartumummi najugaqarfigisamini suliffimmik nutaamik, suliatulluunniit ingerlatami assinganik nassaarniarnera ajornakusoortorujussuusinnaavoq.

Inatsisikkut pisortat suliffeqarfii suliffeqarfiillu namminersortut inuk naallugu qulillu sinnerlugit sulisullit pasinapiluttunik kalerriuteqartarnermut aaqqissuussinermik pilersitsinissaannik pisussaaffilerneqarput. Sulisitsisut sulisuminnik qanoq iliorlutik pasinapiluttunik kalerriisinaanerat isumagissavaat, soorluttaaq pasinapiluttunik kalerriisut kinaassusiisa isertuunneqarnissaat sulisitsisup qulakkiissagaa.

Naggasiullugu siunnersuut tassungalu nassuiaatit innersuussutigissavakka.

Taama oqaaseqarlunga siunnersuut Inatsisartunut suliarineqartussanngortippara.